

四庫全書

集部

欽定四庫全書

石湖詩集卷五

宋 范成大 撰

復自姑蘇過宛陵至鄧步出陸

穀家饋食糧為藩酒市停驂竹廡門紅樹亭亭棲晚照
黃茅杳杳被高原飲溪有跡於菟過掠草如飛扑渥翻
車軌如溝平地少飽帆天鏡憶江村

題南塘客舍

間裏方知得此生癡人
身外更經營君看坐
賈行商輩誰復從容
唱渭城

南塘冬夜倡和

燃萁烘煖夜窓幽時有新詩趣
倡酬為問灞橋風雪裏
何如田舍火爐頭寒釭欲暗
吟方苦凍筆難驅字更遒
絕笑兒癡生活淡略無歲晚
稻粱謀

游金牛洞題石壁上

仙翁舊游處琅璈韻靈曲
至今有餘音玄鶴舞幽谷
衆

真期我住歲晚芝田熟腰鏡從翁來箇雲跨飛鹿

淨行寺傍皆圩田每為潦漲所決民歲歲興築患
糧絕功輒不成

崩濤裂岸四三年落日寒煙正渺然空腹荷鋤那辦此
人功未至不關天

袞山道中

虎嘯狐鳴苦竹叢魂驚終日走蒙茸松林斷處前山缺
又見南湖數十峰

花山村舍

潦退灘灘露沙虛岸岸頽澗聲穿竹去雲影過山來柳
菌粘枝住桑花共葉開菴廬少來往門巷濕蒼苔

清明日狸渡道中

灑灑沾巾雨披披側帽風花燃山色裏柳臥水聲中石
馬立當道紙鴛鳴半空墻間人散後烏鳥正西東

寒食客中有懷

江郭花開也寂寥不須綠暗與紅凋疾風甚雨過寒食

白日青春吟大招芳景尚隨流水去故人應作綵雲飄
煙波千里家何在惟有溪聲似晚潮

南塘寒食書事

埂外新陂綠岡頭宿燒紅裹魚蒸菜把饋鴨鎖筠籠酒
侶晨相命歌場夜不空土風并節物不與故鄉同

周德萬攜孥赴龍舒法曹道過水陽相見留別女
弟

草草相逢小駐船一杯和淚飲江天妹孤忍使行千里

兄老那堪別數年馬轉不容吾悵望櫓鳴肯為汝留連
神如相此俱強健綠髮歸來慰眼前

高淳道中

路入高淳麥更深草泥霑潤馬駸駸雨歸隴首雲凝黛
日漏山腰石滲金老柳不春花自蔓古祠無壁樹空陰
一簾定屬前村店袞袞炊煙起竹林

夜至寧菴見壁間端禮昆仲倡和明日將去次其

韻

杉松廡門森老蒼
佛屋深夜幡花香
借牀睡倒恍何處
夢隨潛魚聽驚榔
咿啞禽語曉光淨
窸窣草鳴朝雨涼
哦詩出門懷二妙
春漲繞山湖水黃

行唐村平野晴色妍甚

煖日烘繁梅穠香撲
征鞅雲煙釀春色
心目兩駘蕩柳
眉翠已埽桑眼青
未放茲遊定不俗
前路八千嶂

嶺上紅梅

霧雨臙脂照松竹
江南春風一枝足
滿城桃李各嫣然

寂莫傾城在空谷城中誰解惜娉婷遊子路傍空復情
花不能言客無語日暮清愁相對生

浙東參政寄示會稽蓬萊閣詩軸次韻寄題二首

仙翁來佩玉符麟綠髮無霜照碧筠永夜闌干千嶂月
清風揮塵七州春塵埃不隔壺中境功業猶關物外身
鸞鶴莫驚兵衛峻主人元是白雲人

鰲背飛來紺碧浮人間還有小蓬丘不須擊水三千里
已壓中天十二樓羽駕舊曾將夢到芝田今合為公秋

玉霄有客方東望
竟欲乘風馭氣遊

外舅輓詞二首

植德千章茂矧材
百鍊剛事功纔止
此物理故難量
鴈序雲天遠
蘭階雨露芳
公無憾身後人
自惜堂堂

幽介聯昏援門闕
閱歲更方欣承燕
几何意寫銘旌
笑語猶尋夢恩勤
已隔生情傷到深
處有淚不勝傾

天平先隴道中時將赴新安掾

霜橋冰澗淨無塵
竹塢梅溪未放春
百疊海山鄉夢熟

三年江路旅愁生
松楸永寄孤窮淚
泉石終收漫浪身
好住鄰翁各安健
歸來相訪說情真

元夕泊舟雪川

蓮炬光中月自圓
人情草草競華年
最憐一夜旗亭鼓
能共鐘聲到客船

桐川郡圃梅極盛皆圍抱高木浙中無有

家住丹楓白葦林
橫枝一笑萬黃金
玉溪園裏逢千樹
還盡春風未足心

牧馬山道中

土橋茅屋兩三家竹裏鳴泉漱白沙
春色惱人無畔岸亂飄風袖拂梅花

宿牧馬山勝果寺

佛燈已暗還吐旅枕纔安却驚月色
看成曉色溪聲聽作松聲

游寧國奉聖寺

松梢臺殿鬱高標山轉溪迴一水朝
不惜褰裳呼小渡

夜來春漲失浮橋

自寧國溪行至宣城舟人云凡百八十灘

波驚石險夜喧雷曉泊旗亭笑眼開休問行人緣底瘦
適從百八十灘來

次韻宣州西園二首

苔茵無地着紅塵花草含芳一笑新不待東君能剪刻
相公筆力挽回春

星芒垂耀筆牀寒河漢波流硯滴乾
槩几松跗入三昧

一篇詩就一杯殘

晚步西園

料峭輕寒結晚陰
飛花院落怨春深
吹開紅紫還次落
一種東風兩樣心

送端言

東君留戀一分春
蜂蝶闌珊燕子新
桃李無情空綠徑
市橋楊柳送行人

早發竹下

結束晨裝破小寒跨鞍聊得散疲頑行衝薄薄輕輕霧
看放重重疊疊山碧穗吹煙當樹直綠紋溪水趁橋彎
清禽百囀似迎客正在有情無思間

小澗

石礙珠旒濺灘平霧縠鋪小童能好事繫馬斲菖蒲

次韻子文探梅水西春已深猶未開水西謂歙溪
而黃君謨州學記云頻江地卑蓋此水為浙之
源正可謂之江也

孤山山下小斜橋客魂曾共暗香飄五年不踏西湖路
想見黃昏清淺處如今憔悴古江干豈有幽芳伴倚欄
臘盡雪殘春不至坐令愁裏眼長寒霜稜未貸千林槁
門外風餐人欲倒斟酌芳心正怯寒有情真被無情惱

後催租行

老父田荒秋雨裏舊時高岸今江水傭耕猶自抱長飢
的知無力輸租米自從鄉官新上來黃紙放盡白紙催
賣衣得錢都納却病骨雖寒聊免縛去年衣盡到家口

大女臨岐兩分首今年次女已行媒亦復驅將換升斗
室中更有第三女明年不怕催租苦

次韻子文衝雨迓使者道聞子規

夢魂翻蜨翅鼻息吼鼉鼓喚起治曉裝馬嘶童僕語汨
泥溷鳬鶩慚愧黃鵠舉猥吟陬隅池浪廢桔槔圃啼鵲
撩客心鈎引着何許請歌蘇仙詞歸耕一犁雨

奉題胡宗偉推官攬秀堂

城外屏峰雲百疊城裏看雲笏拄頰山靈自與人爭秀

明滅煙霏難應接南鄰范叔骨相寒不如騎曹知愛山
晨霞儻可救枵腹丐君分我入朝餐

次韻太守出郊

曉裝縱騎踏芳辰江為安瀾露浥塵
旂戟前驅留住月笙簫後備帶行春
魚龍水面金杯滿鸞鶴山頭綠筆新
聞道將軍寬禮數不辭醕酎吐車茵

曉出古巖呈宗偉子文

曉風生小寒嵐潤裊巾屨宿雲埋樹黑
奔溪轉山怒東

方動光彩晃晃金鉦吐千峰森隱現一氣澹回互平生
癖幽討解后飽新遇那知塵滿甌晨炊午未具不愧忍
飢面來尋古巖路稻梁亦易謀烟霞乃難適持此慰龜
腸搜枯尚能句

積雨蒸潤體中不佳頗思故居之樂戲書呈子文
門外泥深蘸馬鞍墨雲未放四維寬前山忽接後山暗
暑雨全如秋雨寒夢裏江湖三歎息醉中天地一憑闌
斗升留滯休惆悵枳棘從來著鳳鸞

簽廳夜歸用前韻呈子文

簿書堆裏解歸鞍我亦蕭然轡勒寬
爐篆無風香霧直庭柯有月露光寒
閒思喜鵲填河鼓靜數流螢繞井欄
明日又驅官裏去從教白鷺侶紅鸞

聖集誇說少年俊遊用韻記其語戲之

京塵紅軟撲雕鞍年少王孫酒量寬
倚袖竹風憐翠薄捧杯花露怯金寒
黃雲城上栖烏曲綠水橋邊闌鴨欄
別後相思惟故物壁煤侵損扇中鸞

次溫伯用林公正劉慶充倡和韻

前山後山梅子雨屯雲日夜相吞吐長林絕壑望不到
時有樵歸說逢虎奔溪朝來忽怒漲夾岸柳梢餘尺許
屋頭未放濃嵐散苦憶清風汎瓊宇客行落此亂山中
但欲尋人訴羈旅比鄰解后得清士睂宇津津佳笑語
杯行起舞出新句我氣已衰聊復鼓明年與君杭太湖
扁舟踏浪不踏土沉沉玉柱闕仙局矯矯虹梁浮水府
目力無窮天不盡却笑向來誰縛汝

次韻溫伯夜坐今日忽得舍弟到杭消息喜見於

詞

長風吹月來影碎竹間牖良宵坐窘束媿我塵外友平生煙霞興碑兀上南斗頗亦契三三未省計九九迷塗入簿領鄉心幾回首嗟予李行役舟拂漲溪柳凌晨雙鵲鳴翫占得無咎何當從汝去履綦尋蕙畝

再次韻呈宗偉溫伯

官居數椽間局促如瓮牖幸鄰詩酒社金薤對玉友真

清廊廟器偉望配山斗

宗偉自號真清居士

行當侍紫極槐棘位

三九館舍有奇士

謂溫伯

高文粲參首倡酬猥及我雙松

壓孤柳生活從冷淡幸免譽與咎相從結此夏何異歸隴畝

次韻溫伯納涼

日斜猶畏暑吏退合偷閒霞散紅綃薄溪迴碧玉彎伴人惟羽扇娛客欠風鬟且復哦新句相嘲飯顆山

雨涼二首呈宗偉

誰扶病客起龍鍾
恩在盆傾一雨中
問訊九關何路到
擬牋歡喜謝天公

驚雷隱地送涼颼
起舞看山不自持
說與騷人須早計
片雲催雨雨催詩

明日復雨涼再用韻二首

東山朝日澹冥濛
一片雲生萬疊中
宿雨未蘇焦卷盡
又煩箕井喚雷公

濺瓦排檐散萬絲
顛狂風篠要扶持
恩深到骨吾能報

急賦新涼第一詩

次韻慶充避暑水西寺

佳晨出西郭仰視天宇清
樂哉曠士懷浩浩吞四溟
新漲忽勇退籬落粘枯萍
風幡招客遊曠望隔蘋汀
僕夫厲清深竹輿疎亭亭
波翻石鑿落尚帶蛟龍腥
華堂入松竹德人占聚星
脫帽飛羽觴頽放解天刑
時當行火令草廩亦化螢
炎官紛陸梁空飛赤雲駟
遙知隴上耘暴背愁白丁
茲遊豈易得未用難沉冥

送勝子昭績溪罷歸

天馬西極來目力盡九寰執轡者誰歟墮此空谷間
草深石齧足一躍度孱顏長風送逸駕蕩蕩登虎關
五雲清都上白日開帝閑鉤陳動光彩球琳鏘轡環
亦復念舊羣依然難鴛頑紅塵起天末可望不可攀

石湖詩集卷五

欽定四庫全書

石湖詩集卷六

宋 范成大 撰

次韻溫伯謀歸

官路驅驅易折肱
官曹隨處是愁城
隨風片葉鄉心動
過雨千峰病眼明
一齋何須嘗世味
寸田久已廢吾耕
羨君早作歸歟計
屈指從今幾合并

次韻溫伯雨涼感懷

窮士病且飢古今同一流身安腹果然此外吾何求判
司誠卑官未免塵甑憂窮山更瘴暑憊卧不舉頭二物
交寇我生世真如浮晨朝墨雲作疾雷破山丘排檐忽
飛溜蛙蝸鳴相酬朱冠領熱屬橫潰輸一籌新涼蘇肺
氣踏濕登城樓好邀雲雨仙長袖按梁州吹水添瓶罌
淨洗千斛愁何從有此段冰廳冷如秋但覺詩思生爽
氣入銀鈎章成竟何用知能救窮不湯子亦旅食回望
家還羞倡予敢不和共作商聲謳

次韻子文雨後思歸

斷雲將雨洗松篁昨夜癡龍起蟄藏人自無情孤樂事
天猶有意作新涼尊前不見凌波襪樓下空聞拜月香
萬事安能盡如願且來相伴壓糟牀

次韻溫伯苦蚊

白鳥營營夜苦飢不堪薰燎出窓扉小蟲與我同憂患
口腹驅來敢倦飛

慶充自黃山歸索其道中詩書一絕問之

鳴騶如電馬如雷知是婆婆醉尉迴常日錦囊猶有句
況從三十六峰來

曉出古城山

落月墮眇莽殘星澹微茫竹輿亂清溪飛蓋入嵐光松
檜霧靄濕桑麻風露香空翠滴塵纓何必濯滄浪山家
亦早作迨此朝氣涼林深無人聲木末炊煙蒼離離瓜
芋區肅肅棗栗場田園古云樂令我思故鄉墟市稍來
集筠籠轉山忙吏事亦挽我歸路盤朝陽

李深之西尉同年談吳興風物再用古城韻

李侯昔遊吳蓮舟鏡蒼茫風鬟與霧髻共濯玻璃光采
花不盈舫日暮雲水香還登縹緲樓羅襟酒淋浪卷箔
納星月踏筵按伊梁安知有恨事但恐蒹葭蒼風吹落
窮谷草深麋鹿場高岡苦炎熱游子悲異鄉尚喜簡書
省期會無匆忙猶餘作詩苦消瘦如東陽

七月五日夜雨快晴

豐隆坎坎夜伐鼓靈湫老龍撇波舞寒雲掣電上清空

倒捲天潢作飛雨向來炎官作夏旱萬里彤霞烘玉宇
豈惟牛馬困蚊蠅壠上行人口生土我從雪浪葉舟來
不謂山城熱如許天公知我愁欲病施與一涼蘇逆旅
稍聞水繞屋除鳴不覺星從雲罅吐千山濯濯淨鬟髻
缺月娟娟炯睂嫵浮生此景萬事足但欠清歌對芳醕
天上秋期正多事趣駕星橋跨銀渚人間四者自難并
莫妒黃姑迎織女

次韻宗偉溫伯

冉冉流光迫歲餘青林日夜向人疎雨滋巖桂重堆栗

新安木犀秋蕊再花

風折庭蕉又獻書逋客解蘭思婉婉先生彈

缺厭清虛一塵不立渾輸我即境心安是故廬

宗偉新議婚溫

伯病起無聊故有解蘭彈缺之語

再韻答子文

浮生飽外莫求餘羈旅東來計已疎肩聳已高猶索句
眼明無用且繙書百年子莫占元緒萬法吾今付子虛
惟有登臨心未厭黃山聞道勝衡廬

道見蓼花

秋風裊裊露華鮮去歲如今刺釣船
歛縣門西見紅蓼此身曾在白鷗前

次韻溫伯種蘭

靈均墮荒寒采采紉蘭手九畹不留客
高丘一廻首崢嶸路孔棘悽愴肘生柳
遂令此粲者永與窮愁友不如湯子遠情事
只詩酒但知愛國香此外付烏有栽培帶
苔蘚披拂護塵垢孤芳亦有遇洒濯居座右
君看深林

下埋沒隨藜莠

次韻子文

幻塵久已破狐涎身世誰能料鼠肝暮夜雨收千嶂出
晨朝風卷四維寬我今無事不如夢君豈有心猶覓安
但促小槽添壓石龍頭珠滴夜珊珊

次韻知郡安撫九日南樓宴集三首

雙旌暮捲小春容畫棟雲生笑語中但覺山光侵酒綠
不知日脚染溪紅控臨縹緲疑無地指點虛無欲馭風

誰遣玉蟾催騎吹歸來人影在朦朧

珠履參陪北海觴仍邀擁節舊中郎
碧城香霧連天暝黃葉霜風捲地涼
佳節轉頭論聚散清波從古閱興亡
明年重把茱萸醉公在叢霄貢玉堂

斯民鄒魯更豐年雅道淒涼見此賢
萬隴登禾新霽色千村鳴柝舊寒煙
鏘金絕世詩情妙倚劒凌空隸墨鮮
太守新題南樓榜珍重北窓山六六
使君名與汝俱傳

晚集南樓

浪隨兒女怨萍蓬
笑拍闌干萬事空
宇宙勲名無骨相
江山得句有神功
掉頭莫覩秋高鶚
留眼來賓日暮鴻
懶拙已成三昧解
此生還證一圓通

賞雪騎鯨軒子文夜歸酒渴侍兒薦茗飲蜜漿明
日以說同遊戲為書事邀宗偉同作

溪山四時佳
今夕更奇絕
天公妙莊嚴
施此一川雪
飛花浩如海
眩轉塞空闊
水西萬珠樹
玉塔照銀闕
碧溪不受凍
長灘瀉清咽
漁舟晚猶汎
樵擔寒未歇
懸知畫

不到未省詩能說歸來強搜句冰硯冷於鐵不知嚴夫

子迎門生煖熱梅香不可耐

梅即侍兒小名

但覺酒腸燭蜜融

花氣動茶泛乳膏發寧辭春筍寒為暖花瓶滑曹騰畫
屏暖喚起眼餘纈笑我獨何事作此淡生活想像高唐
賦何如徑排闥

從聖集乞黃巖魚鮓

截玉凝膏膩白點酥粘粟輕紅千里來從何處想看船

浪帆風

從宗偉乞冬筍山藥

竹塢撥沙犀頂銳樂畦粘土玉肌豐裹茅束緼能分似
政及萊蕪甑釜空

雪後守之家梅未開呈宗偉

瓦溝凍殘雪檐溜粘輕冰破寒一竿日春隨人意生瑞
葉再三白南枝尚含情定知司花女未肯嫁娉婷官居
苦無賴一笑如河清落木露荒山寒溪繞孤城朝暮何
所見雲黃叫飢鷹東風不早計愁眼何當明北鄰小橫

斜蘚地可班荆憑君趣花信把酒撼瓊英

次韻溫伯城上

閉戶成癡坐扶藜得意行樓臺浮霽色市井碎春聲雪
盡小橋出煙消千嶂生病多無脚力遙羨浴鴻輕

知郡安撫以立春日揭所書新安郡榜南樓之上
曉雪紛集邦人以為善祥遂開宴以落之輒賦
長句一篇以附風謠之末

碧瓦朱甍上牛斗妙墨新題森鎖鈕使君筆力挽春來

一夜飛花暗梅柳南山與樓相對高向來千載爭雄豪
八分三字一彈壓衆峰戢戢如兒曹人間盛事天不隔
急催此雪成三白未論千古福邦人先卜明年滿岡麥
東風酒面吹凝酥不辭醉倒歸相扶短歌萬一傳樂府
湛輩亦與公名俱

次韻知郡安撫元夕賞倅廳紅梅三首

春入林梢一再風破寒勻染費天工雖然媚蕩新粧別
只與橫斜舊格同午枕乍醒鉛粉退曉奩初罷蠟脂融

後來顏色休論似夾路漫山取次紅

眞色生香絕世逢煙光池面兩溶溶楚鄰不待施朱好
號國翻嫌傅粉濃晴日暖雲春照耀溫風霽月夜春容
酒闌且駐紗籠看慢破團團一壁龍

司花一笑為誰開知道朱幡得得來踈影有情當洞戶
薦香無語墮空杯風生翰墨留連看月入笙歌次第催
來歲如今翻舊唱五雲叢裏望三台

新安絕少紅梅惟倅廳特盛通判朝議召幕僚賞

之坐皆有詩亦賦古風一首

華燈收盡江梅落別有橫枝照林薄
天教閨苑染芳根
小住山城慰蕭索
騰騰醉後酒紅醺
淡淡粧成笑靨新
斟酌東君已傾倒
為渠都費十分春
別乘胸懷有風月
催喚清尊洗愁絕
花知主客得不凡
一夜光風融絳雪
樓頭煙暝吹單于
花梢挂星光有無
歸來境熟落春夢
夢入銷香紅綺䟽

胡宗偉罷官改秩舉將不及格往謁金陵丹陽諸

使者遂朝行在頗有倦游之歎作詩送之

凍雲埋山天冥濛北風無情雪塞空道傍人稀鳥飛絕
問君東遊何忽忽君言薄官淡無味免俗未能聊復爾

我評茲事一鴻毛因行且看佳山水陵陽樓閣壓高城

煙屏百疊雙流橫宣城疊嶂樓雙溪閣姑孰江亭更奇絕濃黛兩

抹長眉青當塗蛾眉亭望東梁山如雙眉山形成龍復成虎六代遺

蹤供弔古謂金陵錢山石頭大荒莽蒼江水黃兩涘風煙眇吳

楚賞心亭而花臺所見却浮一葦下長川浮玉低昂波聒天長蘆真州

寺浮玉丹
陽金山也

梁溪南岸小停櫓一酌人間第二泉

無錫惠山陸子

泉

閶門峨峨過吾國

姑蘇僕故里閶門北門也

姑蘇臨波照金碧太

湖三萬六千頃上有垂虹跨南極

吳江長橋三高亭鴟夷子在焉

我家

越相尚神遊試從煙浪訪扁舟問訊白鷗相記否謂言

久客不勝愁軟紅三尺長安道九重城闕乾坤繞西湖

山寺浙江樓君昔曾遊今更好故人客館中天開非君

誰上黃金臺挽着天衢五雲上却望江湖如夢迴萬境

何如一丘壑幾時定解冠裳縛幔亭山下桂叢深清社

向來都寂寞

幔亭清社皆宗
偉舊隱故事

黃伯益官舍賞梅

一杯何處洗愁顏
黃法曹家玉樹寒
翠袖撚香留客看
春風都在小闌干

次韻朱嚴州從李徽州乞牡丹三首

佳人絕世墮空谷
破恨解顏春亦來
莫對溪山話京洛
碧雲西北漲黃埃

歛浦煙山蟠萬疊
釣臺雲日擁千章
兩侯好事洗寒

原闕

寶檻移春入燕香

闌風苑裏司花女肯作山腰水尾來十二玉欄天一笑

只今歸路五雲開

時傳使君
有召命

送琴客許揚歸永嘉

烏帽休衝九陌埃瘦藤定約到秋迴龍湫鴈蕩經行處
斷取松風萬壑來

送李徽州赴湖北漕

徂徠千丈松閱世聳絕壁高標上霄漢峻節貫金石惟

有孤生竹亭亭附微植月夜借清景春朝分秀色託根
未渠央萬牛挽山澤昂藏轉江湖夷路入王國明堂五
雲上一柱屹天極可望不可攀清都與塵隔依然此清
士空山淡愁聞悲吟發清籟搖蕩風雨夕

送通守林彥強寺丞還朝

鴈蕩之山天下無奔岸絕壑不可圖地靈境秀有人物
新安府丞今第一紛綸草木變暄寒竹節松心故凜然
窮山薄宦我無恨識公大勝荊州韓梅風漲溪綠如酒

曉插檣烏上南斗只今廣廈論唐虞斟酌正須醫國手
秀眉津津雙頰丹想看鳴佩翔九關諸公倘欲持公議
莫遣此賢思故山

送溫伯歸唐納婦且約復游雪川

攬秀堂前一笑傾都忘身世兩浮萍扶藜處處從君賞
落筆時時得我驚荔熟聞山勞夢想香茗水約逢迎
祇愁誤入桃源後從此車輪四角生

次韻宗偉閑番樂

十日閒愁晝掩關起尋一笑共清歡罷休詩社工夫淡
洗淨書生氣味酸盡遣餘錢付桑落莫隨短夢到槐安
繡鞵畫鼓留花住賸舞春風小契丹

題漫齋壁

漢陰無械可容機歲晚功名一衲衣
槁木閒身隨念懶浮雲幻事轉頭非
三彭已罷庚申守五鬼從教乙丑歸
富貴神仙兩俱累此心安處是真依

四月十六日拄笏亭偶題

轉午聞雞日正長
小亭方丈納空光
綠陰一雨濃如黛
何處風來百種香

次韻即席

留連銀燭照金荷
腸斷華年一擲梭
月姊有情難獨夜
天孫無賴早斜河
晶晶霜瓦寒生粟
袞袞風幃細湧波
鵲鵲曉啼鳴鵲散
許多佳景奈愁何

五月聞鶯二首

桑陰淨盡麥頭齊
江上聞鶯每歲遲
不及曉風鵲鵲子

迎春啼到送春時

一聲初上最高枝
忙殺嘔啞百舌兒
老盡西園千樹綠
却憐槐眼正迷離

知郡檢計齋熙禱雨登時感通輒賦古風以附輿
頌

六月火雲高偃蹇
使君有意憐焦卷
一封紅篆驛金龍
雨氣倏隨爐燎滿
風師避路雷車鳴
石破天驚檐溜傾
不知稻本頗甦否
但覺溪聲如百霆
稅駕朱橋未云久

造化功成屈伸肘我評茲事與天通知公小試調元手
清壇深夜賓衆真前驅霓旌後颺輪定有靈官識仙伯
報道紫皇思侍臣

石湖詩集卷六

欽定四庫全書

石湖詩集卷七

宋 范成大 撰

送子文雜言

陰谷雲低梅雨多黃山滌源溪湧波南風匝地送歸客
雙槳下瀨如投梭嚴夫子君舉酒我其為君歌萬山叢
叢石鑿鑿官居破屋巢烟蘿杜鵑曉啼猿暮叫客行到
此真蹉跎窮愁無復理一飯三歎息城東蠻舍有佳人

解后使我加餐食同鄉更同調目擊心已傳蟄蟲欲作
雷奮地萬籟方寂風行山吹竽喚我醒連鼓相追攀颺
車電轂不可輦但覺兩腋生飛翰狂歌不必終曲戲奕
不必滿局有時不揖上馬去出門大笑驚僮僕窮鄉眼
冷見未曾道上囁嚅相指目云此陜隘何以有二士直
恐翩翩跨黃鵠廣文組解登王畿諸公貴人爭勸歸常
日心期有定論贈行不惜重費詞腰金佩璐衆目好汗
簡沉碑千載癡一尊有意重山嶽五鼎無心輕網絲嚴

夫子應領略別後頻書相發藥我既為萬頃之狎鷗君
勿作九臯之鳴鶴

新館

露稻粘明璫風茅袞高浪荒烟暗白道行行亂蛩響日
脚午未吐雲頭晚猶漲欣此半日涼籃輿走清曠病客
不堪暑茲行天肯相蚊蟲埽無跡秋意滿千嶂稍尋泉
石盟略褫簿書障鵲原定相念因風報無恙

臨溪寺

萬山繞鈴峴二水奔湏洞亭亭林中寺金碧燦欄棟解
鞍得蒲團卧受瓦爐供少捐一炊頃暫作百年夢無人
自驚覺幽禽正清哢倦客如殘僧無力供世用此行端
為山紫翠迭迎送漱井出門去驚塵撲飛鞚

盤龍驛

聞雞一唱罷占斗三星沒天高月徘徊野曠山突兀暗
蛩泣草露怨亂語還咽涼螢不復舉點綴稻花末惟餘
絡緯豪悲壯殷林樾小蟲亦何情孤客心斷絕魂驚板

橋穿足側石子滑行路如許難誰能不華髮高城謾回首
疊嶂屹天闕遙知秋衾夢千里一飄忽

竹下

松杉晨氣清桑柘暑陰薄稻穗黃欲卧槿花紅未落秋
鶯尚嬌姹晚蝶成飄泊犬駢逐車馬雞驚撲籬落道逢
行商問平生幾芒屨頰肩走四方為口不計脚劣能濡
簞瓢何敢議囊橐我亦縻斗升三年去丘壑二俱亡羊
耳未用苦商略

寒亭

溝塍與澗合隴畝抱山轉向來六月旱此地免焦卷旱
穗已垂垂晚苗猶剪剪一川豐年意比屋閭雞犬老農
霜鬚鬢雙鑠黃犢健自云足踏地常賦何能免刈熟倩
人輸不識長官面康年無復事但恐社酒淺我亦有二
頃收拾尚可繭懷哉笠澤路歸鉏犁頭蘚

清逸江

微生本漁樵長日渺江海扣舷濯滄浪尚說天宇隘竭

來車馬路悒悒佳思敗黃塵撲眉鬚驅逐似償債羸驂
繫偏仄狂犬吠荒怪鄉心入旅夢一葉舞澎湃晨興過
墟市喜有魚蝦賣眼明見清江積雨助橫瀆褰裳喚扁
舟艷艷不勝載不辭野渡險弄水聊一快

隱靜山

杯渡師
道場

五峰抱巖扉千柱奠雲壑荒原蕞爾縣有此寶樓閣維
昔經營初衣錫化雙鶴杖頭具隻眼矯矯雲中落尊者
一笑許璇題照林薄庭柏有祖意石泉韻天樂清簫轉

碧雞飛梭擲蒼鵲號風飢虎怒失木啼猿愕英遊偶然
同吏檄乃不惡題名記吾曾醉墨疥丹堊

新嶺

瘦馬兀瞢騰荒雞號莽蒼絲窠罨朝露籬落萬珠網宿
雲拂樹過飛泉擘山響老桑跼潛蚪怪蔓掛騰蟒山行
何許深空翠滴羈鞅釀愁積雨寒破悶朝日放瞳瞳赤
幟張昱昱金鉦上浮動草花馥清和野禽唱僕夫有好
語沙平路如掌惟憂三溪阻橋斷山水漲

送通守趙積中朝議請祠歸天台

城頭千峰青繞屋城下灘流三百曲誰云偏仄復偏仄
尚有高軒肯來辱紅梅花下兩芳春春風惠和如主人
搶攘塵土簿書裏見此縑籍天球溫厚祿故人車結轍
掉頭獨泛清溪月不從世外得超然世間誰肯如公決
生平我亦一沙鷗葦白蘆黃今正秋送公使我歸思動
破烟衝雨憶扁舟明年想見東山起我亦煎茶石橋水
道逢蓑笠把漁竿即是馬曹狂掾史

送詹道子教授奉祠養親

新安學宮天下稀先生孝友真吾師斑衣悞作長裾曳
二年思歸今得歸牋詞上訴人叵挽璽書賜可羣公歎
青山百匝不留人空與諸生遮望眼白雲孤起越南天
向來恨身無羽翰下馬入門懷橘拜身今却在白雲邊
鶴髮鬢鬢堂上坐兒孫稱觴婦供果世間此樂幾人同
看我風前孤淚墮一杯送舟下水西我欲贈言無好詞
徑須喚起東廣微為君重補南陔詩

道子教授奉祠諸生率余祖席如意院

暫移三席歛雲關木末闌干暮紫間絳帳莫貪江上路
青鞵先試水西山伯陽有道來重趼禦寇他年憶解顏
怪我抗塵驅俗駕諸公何事許追攀

淳安

以後十五首
公檄嚴杭道中

篙師叫怒破濤瀧水石如鐘自擊撞欲識人間奇險處
但從歛浦過桐江

嚴州

舟人云自徽
至嚴二百灘

城府黃塵撲馬鞍一篙重探水雲寒
耳邊眼底無公事
睡過嚴州二百灘

釣臺

臺上題詩甚多其最膾炙者曰世祖功臣二十八雲臺爭似釣臺高

山林朝市兩塵埃邂逅人生有往來
各向此心安處住
釣臺無意壓雲臺

桐廬

濕雲垂野淡疎林十日山行九日陰
梅子弄黃應要雨
不知客路已泥深

富陽

不到江湖恰五年
歛山青繞屋頭邊
富春渡口明人眼
落日孤舟浪拍天

餘杭

春晚山花各靜芳
從教紅紫送韶光
忍冬清馥薔薇醖
薰滿千村萬落香

於潛

俚語云於潛昌
化鬼見亦怕

邑居官寺兩淒清
晚市都無菜可羹
何處直能令鬼怕

祇今猶自有人行

昌化

雙溪館
絕景也

翠染南山擁縣門一洲橫截兩溪分
長官日永無公事
卧聽灘聲看白雲

百丈山

壽聖寺僧房甚雅潔
去王干嶺尚六十里

沐雨梳風有底忙
解鞍來宿贊公房
傳聞三嶺連天峻
未到王干已斷腸

昱嶺

竹輿搖兀走婆婆石滑泥融側足過
昱嶺不高人已困
晚登新嶺奈君何

王干嶺

山靈設險合崢嶸行客何須向此行
羸馬不前人雨汗
此身安得諱勞生

刈麥

麥熟連雨妨刈老農云得便晴即大獲不爾當減分數

麥頭熟顆已如珠小阮惟憂積雨餘
勾我一晴天易耳
十分終惠莫乘除

插秧

種密移疎綠毯平行間清淺穀紋生誰知細細青青草
中有豐年擊壤聲

曬繭

俗傳葉貴即蠶
熟今歲正爾

隔籬處處雪成窩牢閉柴荆斷客過葉貴蠶飢危欲死
尚能包裹一絲窠

科桑

斧斤留得萬枯株獨速槎牙立暝途飽盡春蠶收罷繭

更殫餘力付樵蘇

龍學尚書新安侯羅公挽詞二首

汝楫

今代丹臺籍頻年綠野居鐵冠真御史革履舊尚書短
世浮雲盡平生半稿餘人言公不朽蘭玉照前除
一昨更調瑟如聞欲賜環途殫泣西狩望絕起東山華
屋林霏慘新阡草露班春風埋玉淚重為庾公潛

龍學侍郎清河侯張公輓詞二首

白水名多士清河最有聲人危孔北海帝識柳宜城蜀

險談間固蠻訐檄到平凌烟何處在風雨上銘旌
太息逢萋錦平生付薄冰滄溟淙赤舌白日照青蠅嶽
麓身猶健星維馭已升天如遺一老人亦望三登

新安侯夫人俞氏輓詞

蚤兆于凰卜來嬪駟馬車夫君宜竹帛子舍各詩書露
薤丹旌舉風揚組帳虛空餘彤管訓他日照鄉閭

次韻甄雲卿晚登浮丘亭

賓筵舊壓三千客燕榭新高十二城潑墨雲頭連樹暗

垂絲雨脚過溪生
葛巾羽扇吾身健
雪挽冰甌子句清
從此相從須痛飲
故應此事勝公榮

古風上知府秘書二首

神仙絕世立功行
聞清都玉符賜長生
繭雲遊紫虛雞犬
爾何知偶舐藥鼎
餘身輕亦仙去
罡風與之俱俯視
舊籬落眇莽如積
蘇非無鳳與麟
終然侶蟲魚
微物豈有命
政爾謝泥塗
時哉適丁是
邂逅真良圖

大鵬上扶搖
南溟聒天沸
斥鷃有羽翼
意滿蓬蒿裏
不

如附驥蠅掣電抹荆薊誰云極么麼俛仰且萬里向來
庭戶間決起不踰咫飄飄托方便意氣乃如此物生未
可料旦暮倘逢世君看功名場得失一交臂

挂笏亭晚望

林泉隨處有清涼山繞闌干客自忙溪雨不飛虹尚飲
亂蟬高柳滿斜陽

乳灘

巖巖之間灘如竹節
乳灘之險居第一

清溪可怖亦可喜造化於人真虐戲轟雷捲雪鬢成絲

一擲平生來此試險絕無雙是乳灘舟如滾石下高山
畫樓正倚黃昏雨豈識江間行路難

浮丘亭

知郡秘書新作以望黃山有浮丘容成峰浮丘公容成子之所遊也

黟山鬱律神仙宅三十六峰雷雨隔碧城欄檻偃雙旌
笑挹浮丘為坐客巖扉無鎖晝長開紫雲明滅多樓臺
雲中仙馭參差是肯為使君乘興來西崑巉絕不可至
東望蓬萊愁弱水誰知芳草徧天涯玉京只在珠簾底
他年麟閣上清空却訪舊遊尋赤松我亦從公負丹鼎

來斲砂牀汲湯井

朱砂峰溫泉皆在黃山黟山即黃山

風月堂

章倅新作洪守名而記之

天風無邊吹海月景入溪山更奇絕
太守文章別乘賢平生付與金杯滑
門闌我亦似彭宣想聞橫玉叫蒼烟
讀碑索句仍投轄誰是揚州控鶴仙

寄贈泉石使李元直入覲

漢圖昔中天百六啓真主當時鄧高密
徒步赴光武諸公上雲臺一葉渺湘浦
聲名三十年玉氣貫晴宇向來

宣室問天語道舊故不圖太平日復見起兵簿雙旌莫
侯服三節臨江潁垂欲大用公少駐議園府人言山澤
官底用廟廊具果聞一乘傳已踵追鋒去翔鳳覽輝來
風采照鴛鴦平生經濟心十不一二吐茲行公勿遜安
國如鼎呂

休寧

南街豪郡城東園壓州宅誰云沸鑊地氣象不偏仄林
園富瓜筍堂密美杉柏山醪極可人溪女能醉客吳子

邑中彥毫端萬人敵傳杯相勞苦不覺東方白

吳益恭豪士也

祁門

石梁平波心金剝駕巖腹溪藤卷霜繒山骨琢紫玉東
堂有嘉名窈窕窻紗綠落花埽無迹蕉葉森似東主人
甚愛客挽袖語陸續衝雨出門去役役媿童僕

靈山口

陵高類登天斗下劇窺井衡從十里近底用許多嶺秋
雨釀春泥掀淖力扛鼎僕夫負隅哭邂逅憂性命舊嗤

子猷狂夜半槳歸艇方知興盡處頃步令人癭

浮梁

大灘石如林小灘石如拚微生拋擲過兩槳若將割一
灘復一灘食頃經七八崎嶇幸脫免已足凋鬢髮我家
五湖船鏡面貼天闊行迷勿浪遠歸歟泛花月

番陽湖

淒悲鴻鴈來決渚魚龍蟄雷霆一鼓罷星斗萬里濕波
翻漁火碎月落村舂急折葦已紛披衰楊尚僵立長年

畏簡書今夕念簑笠江湖有佳思逆旅百憂集

回黃坦

渥丹楓凋零濃黛拍幽獨畦稻晚已黃陂草秋重綠平
遠一橫看浩蕩供醉日落帆金碧溪嘶馬錦繡谷世界
真莊嚴造物極不俗向非來遠遊那有此奇矚

桑嶺

回腸山百盤揮手天一握俯驚危棧穿仰詫飛石落挽
輿如挽舟絕叫斷雙笻怪蔓纏枯槎瘠草被幽壑此豈

車馬路誰云強刊鑿人言遠遊好呼來試着脚

天都峰

黃山

維帝有下都作鎮此南國孤撐紫玉樓橫絕太霄碧晶
熒砂竇紅天矯泉紳白晴雲無盡藏竟日裊幽石諸峰
三十五離立侍傍側會稽眇小哉請議職方籍

溫泉

黃山朱
砂峰下

砂牀毓靈源石液漱和氣鬱攸甌常蒸感沸鼎百沸人
生本無垢安用滌腸胃一瓢灑清肥回首謝羅爵山深

人跡罕政以遠為貴君看華清池談者至今諱

石湖詩集卷七

欽定四庫全書

石湖詩集卷八

宋 范成大 撰

伏聞知府祕書欲取小杜桐廬詩語以見花名堂
成大記東坡送鄭戶曹詩云蕩蕩清河壩黃樓我
所開遲君為坐客新詩出瓊瑰樓成君已去人事
固多乖此段大類今日成大作且受代計梅開堂
成歸舟已下南浦欲為坐客不可得懷不能已請

先為公賦之

使君來煖東堂席又見堂前花信息小白猶封竹外枝
微黃已點眉間色山城十月如春臺聞有細書天上來
說與橫斜應早計不須更待雪花催

知府秘書遣帳下持新詩追路贈行輒次韻寄上
冷雲去仍來凍雨落還歇平明一篙漲珍重送船發端
成南溪泛寧復東堂謁何時公三日請澤看山笏恩勤
一未報終古銘肌骨幡幡跡雖遠耿耿心不沒門闌如

水波永印此孤月

寄上鄙句之明日舟次梅口南枝已有春意復次

知府祕書贈行高韻

晏溫解船去暮夜攢船歇橫斜隘梅村玉蓓粲將發城
中三輔豪指日承明謁高懷妙康濟未試君前笏周南
又小春微溫入花骨我瞻浮丘亭山高壑柄沒飛鳥正
飄蕩空繞南枝月

晞真閣留別方道士賓實

東山西山雙袖舞中有清宮蟠萬礎雲橫朱閣碧梧寒
風埽石壇蒼檜古道人賓實其姓方來從何許今幾霜
誅蒿仆蓬殿突兀玉華紫氣騰真香胸竒腹憤無人識
我獨相從似疇昔時時苦語見鍼砭邂逅天涯得三益
明朝歸客上歸艎重到晞真計渺茫只有雙魚相問訊
歙江之水通吳江

程助教遠餞求詩

殘山剝水帶離亭送客煩君遠作程直欲明年擊吳榜

白沙翠竹是柴荆

次伯安推官贈別韻

交情彌歲竟忽忽短棹歸尋一畝宮
塞責文書容我懶及時盃酒賴君同
披雲峰頂城頭月攬秀堂前扇裏風
千里音書慰離索莫言天遠費鱗鴻

次景琳錄事贈別韻

放船鳴櫓便秦吳送別空煩長者車
宿霧鎖山常羃羃斷雲將雨忽踈踈
高城五嶺花深處短棹三江木落初

賴得溪流通尺素蒲根仍有一雙魚

次黃必先主簿同年贈別韻二首

當年仗外揖高標繡韉蘆鞭寶馬騎瓊苑天香飄合坐
碧城山色照同僚思歸意決吾張翰贈別情深子繞朝
鱗鱗魚梁從此去他年書札墮烟霄

山郭官閒得爛遊彌年還往話綢繆西園剝栗催奴課

東院尋梅勸客留

皆薄廡
故事

筆下修鋒千首富談間和氣

兩眉浮別來悵望何時見謾上重城謾上樓

次胡經仲知丞贈別韻

先生有道抗浮雲，拄頰看山意最真。
霜鬢不堪庖首疾，翠蛾常作捧心顰。
官如斯立藍田小，家似淵明栗里貧。

俯仰別來冀英換，祇今誰與話情親。

經仲與侍兒皆多病，又不樂贊邑賦。

歸去
來詞

次諸葛伯山贍軍贈別韻

歛維羣山圍漫仕，富英傑清標照人寒。
玉筍森積雪，嗟余獨委瑣，無用等木屑。
又如道傍李，味苦不堪折。歸舟

坐成泛去馬亦已刷三年風波險盡付一笑閱惟君同
懷抱各坐天機拙我家鷗夷子竹帛照吳越雲仍無肖
似頰首媿前哲若家卧龍公事業管蕭埒期君踵祖武
勿惜兒女別言狂舉白浮醉倒霜松折

次韻樂先生除夜三絕

團蒲曲几坐成癡北看南觀恍是非道眼已空詩眼在
梅花欲動雪花稀

天邊客裏五迎冬爭信還鄉似寓公人事都非城郭是

獨憐雞犬識新豐

牀頭厯日鬢絲絲
懶倦慵吟守歲詩
宜入新年須吉利
明朝把筆寫門楣

次韻唐幼度客中幼度相別數年復會於錢塘湖
上

西湖冰泮綠生鱗
料峭東風欲中人
花片不禁寒食雨
鬢絲猶那湧金春
江山契闊詩情在
京洛追隨客夢新
喚取歌聲不愁思
為君吹水引盃頻

客中呈幼度

手板頭銜意已慵
墨池書枕興無窮
釀泥深巷五更雨
吹酒小樓三面風
草色有無春最好
客心去住水長東
今朝合有家書到
昨夜燈花綴玉蟲

奠唐少梁晉仲兄弟墓下

當年連璧氣如蜺
人許躋攀九列齊
黃壤一時埋玉樹
青雲何處用丹梯
生平書札頻雙鯉
歲晚交情但隻雞
眼底傷心難制淚
寧論宿草已萋萋

鎮東行送湯丞相帥紹興

吳波鱗鱗越山紫鎮東旌旆東風裏前驅傳道相君來
一夜鑑湖春漲起鑑湖如鑑涵空明相君出處如湖清
十年勲業泰山重五鼎富貴浮雲輕人言公如裴相國
綠野堂高貯風月我獨願公如子牟身在江湖心魏闕
浯溪有石高嵯峨公方東征如此何丁寧湖水莫斷渡
早晚歸來絕江去

水月菴謁現老不值

有客叩巖扃無人管送迎片雲閒出岫水月自空明

次韻邊公辨

錯落參旗冒竹梢柴荆臨水閉蓬蒿清風吹曉玉蟾墮
穠露洗空銀漢高雙鵲繞枝應也倦一蛩吟壁已能豪
新秋只合添詩興莫學潘郎歎二毛

中秋無月復次韻

屋山從捲杜陵茅門徑慵芟仲蔚蒿澹澹白虹風暈壯
紛紛蒼狗雨雲高凌空累筍仙無術半夜撞鐘句謾豪

枵腹題詩將底用真成兔角與龜毛

公辨用前韻見贈復次韻

先生筆力玉山鼇氣壓明堂一柱蒿雪碗滌毫詞絕妙
朱絃縮瑟調彌高心兵不起無三粲坐客常多似四豪
喜有過從南北巷蘇蘭薪桂淪溪毛

公辨再贈復次韻

書生活計極蕭騷爝火微明似束蒿犬子地寒徒壁立
元龍身懶謾樓高筆端未辦誇三絕酒裏猶能埽二豪

又向詩壇靳借一強磨鉛鈍齒吹毛

送施元光赴江西幕府

鎮南旌旆照江皋入幕如今客最高月暗秋城稀擊柝
雲飛朝棟賸揮毫長亭酒盡歌三疊半夜溪深雨一篙
莫戀陽關更西路九關歸路踏金鼇

次韻林子章阻淺留滯

客行端似未歸雲指點璿杓幾易辰喜有風花黃作暈
似聞溪漲綠生鱗我從走俗言無味君已鳴文筆有神

繡段炳然空辱贈急繙緹襲埽蛛塵

次韻馬少伊木犀

月窟飛來露已涼斷無塵格惹蜂黃纖纖綠裏排金粟
何處能容九里香

水尾山腰樹影蒼一天風露不供香誰家鏡裏能消得
付與詩人古錦囊

密密嬌黃侍翠輿避風遮日小扶疎畫闌想見懸秋晚
無限宮香總不如

林夫人挽詞

黃中之妹知書

翰墨門闌正巋然故應婉婉亦儒先與聞古學三十禮
能誦家書四百篇卜協媯姜占永世夢呼辰已識週年
班姬合有遺文在後日從容訪孟堅

李仲鎮懶窩

求名當着鞭訪道亦重趂二邊俱不住三昧不如懶向
來南嶽師自謂極蕭散收涕且無緒客至那可款爭如
懶窩高門外轍常滿殊不妨嘯歌秉燭苦夜短天寒雪

欲花屋角黃雲晚徑須煩二妙對洗玻瓈盞

次韻陳季陵寺丞求歙石睂子硯

金星熒熒睂子綠婺源琢石如琢玉寶玩何曾掇枵腹
但愛文君遠山感丈人筆陣森五兵書品入妙仍詩名
我有陂陀天海樣與公文字俱金聲臬廬一擲不須呼
況敢定價論車渠只煩將到粧臺下試比何如京兆畫
次韻季陵貢院新晴

鎖闌令嚴深復深五星簾幕晴若陰澹雲微月謾清夜

短檠政自闕人心看燈作暈生睡色江南行處夢不隔
覺來快讀新晴篇恍然真我鶯花前徑欲觴公後堂酒
倘煩春衫小垂手

次韻周子充正字館中緋碧兩桃花

碧城香霧赤城霞染出劉郎未見花憑仗天風扶絳節
為招萼綠過羊家

明日子充折贈次韻謝之

海上三山冠綵霞六時高會雨天花步虛聲裏隨風下

吹落尋常百姓家

明日大雨復折贈再次韻

一天雲葉翳朝霞
風卷泥沾不惜花
羣玉山高春好在
人間烟雨暗千家

張恭甫正字折贈館中碧桃因次子充韻

次年

滿枝晴雪照青霞
舊識桃源暈碧花
俯仰京塵隔年夢
東風猶認故人家

雨中報謁呈劉韶美侍郎

花落滿城雨雨餘雲重陰驅車有底急巷泥三尺深平生黃篋舫漁榔有清音斗升得苦相懷刺衝愁霖歸來掩關卧一枕直兼金作詩詫比鄰幸勿譏偏心

雨中集水月

獻之今年不堪暑天亦相憐病良苦明便中秋法合涼夜半行雲曉行雨蘄州竹簟清如水飢蚊倔強猶鳴聲下牀蚤喜衣裳健出門更覺山川明曳屐扶藜尋水月不惜垂垂巾角折竹間松下已淒然却要芳樽生煖熱

送洪景廬內翰北使二首

金章玉色照離亭，戰伐和親決此行。
國有威靈雙節重，家傳忠義一身輕。
平生海內文場伯，今日胸中武庫兵。
萬里往來公有相，淮瀆陰德貫神明。

近日兩淮戰地掩骼公之請也

檄到中原殺氣銷，穹廬那敢說天驕。
今年蕃始來和漢，即日燕當遠徙遼。
北土未乾遺老淚，西陵應望孝孫朝。
著鞭往矣功名會，麟閣丹青上九霄。

次韻嚴子文旅中見贈

杯中疇昔共江天傾座新詩報警聯海浦寸心空共月
京華雙髻各週年交情敢說同方友句法甘從弟子負
有意數從文字飲何須爭着祖生鞭

次韻子文客舍小樓

客裏仍攜一束書閉門虹氣自凌虛未聞光範延珠履
誰向甘泉從玉車散盡生涯千荅布收將文價百車渠
淹留且結西湖夏同到秋風賦遂初

次韻劉韶美大風雨壞門屋

雲烟揮翰墨池翻綳縹如山畫掩關已許六丁收散落
只愁雷電費牆藩

洪景廬內翰使還入境以詩迓之

玉帛干戈洵並馳孤臣叱馭觸危機關山無極申舟去
天地有情蘇武歸漢月凌秋隨使節胡塵捲暑避征衣
國人渴望公顏色為報褰帷入帝畿

寄題向撫州采菊亭

一葉起秋色衆綠凋歲華耿耿霜露側餘此黃金葩西

風滿天地孤芳照塵沙殷勤開小築花氣日夕嘉落英
楚纍手東籬陶令家兩窮偶寓意豈必真愛花不如亭
中人一笑了天涯采采勿虛度門前欲高牙

古風二首上湯丞相

抱瑟游孔門豈識宮與商古曲一再行乃雜巴人倡知
音顧之笑解絃為更張歸來掩關卧冰炭交愁腸平生
桑濮手未省歌虞唐明發理朱絲復登君子堂遺音入
三歎山高水湯湯

空山學仙子窮年卧巖扃煮石不得飽秋鬢蒼已星道
逢紫霄翁示我餐霞經采采晨之華滌濯腐與腥向來
役薪水終然槁柴荆跪謝起再拜飄飄蛻蟬輕飛升那
敢學倘許學長生

冷泉亭放水

古苔危磴著枯藜脚底翻濤洶欲飛九陌倦遊那有此
從教驚雪濺塵衣

九月十日南山見梅

五斗留連首屢迴來尋南澗濯塵埃春風直恐淵明去
借與橫斜對菊開

送汪聖錫侍郎帥福唐

承明纔入又南州重見旌旗照柁樓道義平生無捷徑
風波隨處有虛舟如公未可違文石稽古何妨欠碧油
我亦登門煩著錄此行無力為王留

送王純白郎中赴閩漕

聲利場中百戰鏖今誰勇退似公豪緩尋南粵千山路

先破西興百尺濤平日曼容嫌祿厚他年文本歎官高
才名政爾歸安往富貴追蹤未可逃

純白先君平生約
官至正郎而休卒

踐言故純白為兵部
便丐去以承其志

長至日與同舍遊北山

歲晚山同色湖平霧不收寒雲低閣雪佳節靜供愁竹
柏森嚴立蒲荷索莫休瘦筇知脚力政爾耐清遊

石湖詩集卷八

欽定四庫全書

石湖詩集卷九

宋 范成大 撰

次韻尹少稷察院九宮壇齋宿

草草馳三里蕭蕭共一餐
吏方縣禮絕公自將詩壇
隙月窺牀近窓風刮坐寒
鴉鳴未忍散端為四并難

冬祠太乙六言四首

三一舊傳神呪十神今濟
時艱願挽靈旗北指為君直

擣陰山

月色朧明碧瓦蠟烟浮動黃簾罨騎颺輪欲下一天飛
霰纖纖

雲木栖烏未動風庭警鶴先鳴殘夜百靈夙駕人間鼻
息雷驚

行道羽衣縹緲捲班玉珮冬朧回首金鋪獸面步虛聲
在天風

次韻李子永雪中長句

黃昏苦寒烏鳥稀
吹沙走石交橫飛
布衾如鐵復似水
夢想東風來解圍
豈知天地有奇事
夜半窓紙生光輝
兜羅寶界佛所現
冥凌不敢專璿璣
開門倚杖眩一色
迴立此世空無依
少年行樂恍尚記
瑤林珠樹中成蹊
犬驕鷹俊馬蹄快
狡穴未盡須窮追
湖海粗豪今豈在
但憶鳴哮如餓鴟
北鄰亦復淡生活
要我忍寒吟此詩
手龜筆退不可捉
墨泓齟齬永生衣

次韻子永見贈建除體

建子玉杓直黃昏月如霜除道啓柴局客來巾履忙滿
炷寒缸油共此書檠光平生卜鄰願何意登我堂定交
吾豈敢南榮慚伯陽執手道古作遺篇記河梁破窓風
鳴悲孤客多慨傷危腸不抹飢我詩安得昌成章類村
歌但可侶牛羊收功翰墨數微子誰能良開卷得雅音
玉鑾導旂常閉戶坐相念雪深梅暗香

與胡經仲陳朋元遊照山堂梅數百株盛開

九陌緇塵滿客襟錢塘門外有園林胡牀住處梅無限

酒旆垂邊柳未深晴日煖風千里目殘山剩水一人心
元方伯始皆吾黨解后清遊直萬金

次韻胡邦衡祕監

斯言向來立千古敢疵瑕有命孤蓬轉何心勁箭加人
窮名滿世天定客還家回首冥恩怨虛空不著花

三月四日驟煖

日脚融晴晚氣暄睡餘初覺薄羅便如何柳絮沾泥處
煖似槐陰轉午天

久雨地濕

汗礎經旬未肯乾
破窓隨處有蝸涎
祇今不耐春陰得
想見黃梅細雨天

畫錦行送陳福公判信州

漢家麟閣多王侯
冠佩相望經幾秋
畫錦聲名兩榮耀
惟有信州如相州
國南門頭折楊柳
借問江津垂白叟
住在行都四十年
曾見歸舟似公否
人言公與赤松期
飄車羽輪來何時
雲出雲歸俱是道
苦學赤松還未妙

君不見補陀大士海復山隨喜却來觀世間

送張真甫中書奉祠歸蜀

種成桃李恰新陰
忽憶家山叢桂林
客路莫嫌歸計拙
春江爭似駭機深
一封朝奏鈞天夢
萬里江行魏闕心
後日還朝飽風露
黑頭應有雪絲侵

送周子充左史奉祠歸廬陵

黃鵠飄然下九關
江船載月客俱還
名高豈是孤臣願
身退聊開壯士顏
傾蓋當年真旦暮
沾巾明日有河山

後期淹速都難料相對猶憐鬢未斑

送陳天予大監同年使閩

春闕十載記英遊蚤喜時才近采旒夷路着鞭方逸駕
急流回首忽扁舟雲霄正穩君猶去塵土無邊我合休
問訊後車容客否茶山荔浦看南州

送陸務觀編修監鎮江郡歸會稽待闕

寶馬天街路烟蓬海浦心非關愛京口自是憶山陰高
興餘飛動孤忠有照臨浮雲付舒卷知子道根深

見說雲門好全家住翠微京塵成歲晚江雨送人歸邊
鎖風雷動軍書日夜飛功名袖中手世事巧相違

送李仲鎮宰漂陽

相逢已歎十年遲冷淡貧交又語離玉筍換班通籍後

黃梅催雨送帆時月巖家世猶為縣

仲鎮方叔孫也

金瀨溪山

好賦詩喚起酸寒孟東野倒流三峽洗餘悲

送吳元茂丞浦江

玉筍翻乘縣佐車飄然不肯待新除才名已被人爭說

官簿何妨計小疎憶昨西湖同我載從今南浦望君書
遙知斂板趨風後始覺承哉果負予

雪晴呈子永

碧空無處泊同雲晴入荒園鳥雀馴冰面小風池欲動
雪邊濃日瓦如薰塵容俗狀長為客冷蘂疎枝又作
春詩卷豈能生煖熱犯寒聊復惱比鄰

去聲

次韻子永雪後見贈

雪瓴待伴半陰晴竟日檐冰溜雨聲九陌泥乾塵未動

南山石露塔猶明稍聞吉語占農事便覺歸心勝宦情
想得秫田來歲好瓦盆加釀灌愁城

次韻郊祀慶成

帝德重堯緒天心與舜禋慶期符後甲元日際初辛土
緯扶南極旄胡拱北辰律諧風自艮衡正斗垂寅桂燎
靈宮曉蕭脂太室晨百神森壁壘萬衛密鈎陳日月青
旂色雷霆玉輅塵洗兵銀漢水收雪紫壇春天步臨黃
道仙班像玉宸陶匏宗素樸琮璧慕精純祕祝哀時對

高旂歛下賓金鐘鳴傑簾朱火焚芳薪日麗雞竿矗天
旋鳳律新端門敷錫後六合共綢緼

從巨濟乞蠟梅

寂寥人在曉雞窓苦憶花前續斷腸全樹折來應不惜
君家真色自生香

次韻朋元賣花處見梅

烟濃日淡不多寒擔上看花雪作團想得竹邊春已暗
明朝走馬過溪看

與正夫朋元遊陳侍御園

沙際春風捲物華
意行聊復到君家
年年我是曾來客
處處梅皆舊識花
官減不妨詩事業
地寒猶辦醉生涯
城中馬上那知此
塵滿長裾席帽斜

正月十四日雨中與正夫朋元小集夜歸

燈市淒清燈火稀
雨巾風帽笑歸遲
月明想在雲堆處
客醉都忘馬滑時
老去樽前花隔霧
春來句裏鬢成絲
浮生不了悲歡事
作劇兒童總未知

次韻子永夜雨

辦作長愁客工哦苦雨吟挑燈今夕意欹枕故園心漏
屋踈踈滴空檐細細斟相過巷南北屐齒怕泥深

次韻朋元遊王氏園

聯翩步履翠微間回首紅塵自鮮歡捲地雨添千澗急
擁門雲鎖兩山盤絕憐茶笋能留客仍喜蛙聲不在官
雪白楊梅消息未重來應至麥秋寒

遊靈石山寺

寺門頰壁有仙人顏禹李甲蕭筠三
人題詩方運筆時伸臂丈餘闔人驚

報主僧回
頤已失矣

西湖富清麗城府塵事并我獨數能來不負雙眼明騷
騷殘絮罷颭颭新荷成歲華日夜好遊子能無情午陰
釀初暑稍喜巾袂輕小風吹鬢毛將我入松聲崖寺金
碧暗石泉肝膽清壽齒萬蛟舞靈峰雙髻撐仙人昔來
游筆墨上朱甍舉臂尋丈高聊得兒童驚老矣謝狡獪
題詩記吾曾

次韻李器之編修靈石山萬歲藤歌

君不見東林怪蔓之詩三百年字如金繩鐵索相糾纏
不如李侯靈石句筆陣壓倒長城堅藤陰詩律兩秀發
此段奇事今無前吾聞草木未有不黃落雨荒霜倒相
後先繇繇紫茁天所壽風雨不動常蒼然堅姿絕鄰傲
一世深本無極融三泉騰蚪舞蛟矯欲去流蘇絡帶翩
如仙班荆芘賴得吾黨酌泉共吸杯中天詩成一斗屬
太白擘牋揮埽如雲烟北門西掖君自有坐擁紅藥然
金蓮山腰澗底莫濡滯早晚天風吹蛺蝶

次韻正夫遊王園會者六人

丘園窈窕復崎嶇草木生香景倍殊
花下百杯齊物我雲邊一眼盡江湖
不知朱戶趙趙者能勝青山放浪無
六逸蕭然真可畫為君題作竹溪圖

四月五日集陳園照山堂

尋壑經丘到此堂官閑聊作送春忙
短籬水面殘紅滿團扇風前衆綠香
盡捲簾旌延竹色深斟杯酒納山光
洞門無鎖城門近轉午雞啼日正長

題寶林寺可賦軒

十里山行雜市聲
道傍無處濯塵纓
寶林寺裏逢修竹
方有詩情約略生

次韻朋元久雨

誰釀愁霖玉宇間
都緣梅子要爛斑
騰騰困思午猶夢
擾擾奔雲風未還
休問滿城騎馬滑
不妨長日閉門閑
今朝晴色熹微似
乾鵲飛來語屋山

韓無咎檢詳出示所賦陳季陵戶部巫山圖詩仰

窺高作歎息彌襟余嘗攷宋玉談朝雲事漫稱
先王時本無據依及襄王夢之命玉為賦但云
嬋嬋怨以自持曾不可乎犯干後世弗察一切
溷以媒語曹子建賦宓妃亦感此而作此嘲誰
當解者輒用此意次韻和呈以資撫掌

瑤姬家山高插天碧叢奇秀古未傳向來題目經楚客
名字徑度岷峨前是邪非邪莽誰識喬林古廟常秋色
暮去行雨朝行雲翠帷瑤席知何人峽船一息且千里

五兩竿頭見旛尾仰窺仙館至今疑行人問訊居人指
千年遺恨何當申陽臺愁絕如荒村高唐賦裏人如畫
玉色頰顏元不嫁後來飢客眼長寒浪傳樂府吹復彈
此事牽連到溫洛更憐塵韉有無間君不見天孫住在
銀濤許塵間猶作兒女語公家春風錦瑟傍莫為此圖
虛斷腸

次韻樂先生吳中見寄八首

金鶴飛來尺素通新詩字字挾光風三年湖海關心處

都在先生句子中

官居門巷果園西桃李成蹊杏壓枝如許年芳忙裏過
斬新今日試題詩

墓林棲鳥各深枝燕子知巢觸幔飛倘有三椽今已去
不關五斗解忘歸

懶不看書似姓邊夢魂飛繞白鷗前須知席帽衝塵出
不似蓬窓聽雨眠

送春濛雨漲蘋灘荷葉田田柳絮闌想見垂虹三萬頃

拍天湖水釣絲寒

知從了義透音聞古井無波豈更渾便好一坑埋衆妙
何須六結解諸根

幾多螻蟻與王侯往古來今共一丘遮莫功名掀宇宙
百年兩角寄蝸牛

粟囊聊復寄三餐埋沒緇塵懶濯冠紅紫百般紛過眼
鄉山歲晚自蒼官

胡長民監元挽詞

太學齏鹽舊中吳翰墨聲關山題柱筆風露讀書檠夜
雨綠荷破孤墳丹桂生空將擅場手往記玉樓成

次韻朋元正夫夜飲

歌豪仍作家奕勝豈徼幸莫嗤老非少乃尚可以逞玉
瓶引杯長政爾寒漏永二三文章公共此銀燭影陳卿
得秀句劉郎一笑領羸驂兀殘夢乘墜恍難省曉枕江
更潮俱墮無何境

次韻趙正之同年客中

清班合列大明宮
自要牛刀試一同
踏徧巉巖吾道在
莫將尋尺較窮通

羶車席帽各青春
花下驂騑一闕塵
離合飄零十霜露
咸陽客舍有詩人

可憐山縣五斤手
不識王孫八斗才
君自扶搖有霄漢
從渠蜩鷃舞蒿萊

次韻陳季鄰戶部旦過菴


宦遊觸處似懸匏
北嶽南山想獻嘲
拍手百年休鑄鐵

蓋頭一把暫誅茅玉京歲晚梧桐落水國霜清橘柚包
飛錫已隨歸夢去何人頂上鵲成巢

朋元不赴湖上觀雪之集明日余召試玉堂見寄
二絕次其韻

雪溪清興未渠闌晚上西樓帶月看公子自貪低唱酒
肯來同對玉峰寒

文場寧復鬢霜宜白玉堂前雪霽時不惜狂言振忌諱
秃毫冰硯竟無奇



石湖詩集卷九

欽定四庫全書

集部

石湖詩集卷十二

詳校官庶吉士臣陳若霖

主事臣呂雲棟覆勘

總校官庶吉士臣何思鈞

校對官編修臣勵守謙

謄錄監生臣邵敬修

欽定四庫全書

石湖詩集卷十

宋 范成大 撰

翰林學士何公

傳

輓詞

以下館中作

盛際羣多士諸儒遜一賢
名場魁淡墨官簿到花磚
地近行知政天高不假年
書生稽古力何必盡台躔

送洪內翰北使二首

郊廟熙成需率濱
罪如搢夏亦維新
邊烽已却來南虜

使節猶煩第一人遙想穹廬占漢月便呼重譯布唐春
單于若問公家世說與麒麟畫老臣

峨冠方侍玉輿香

公比侍祠郊裡
執綏備顧問

雙節飄然照大荒正

倚先生令國重寧容大敵詫兵強天教忠信行區脫人
許功名上太常試卜和羹知未晚歸來烟雨正梅黃

次韻趙德莊吏部休沐

竊窺新堂好委蛇夜直還遙知欹帽髮正奈捲簾山門
外客姑去窓前人對閒誰能烏帽底塵土浣朱顏

次韻王夷仲正字同遊成氏園

秀巖堂上玉東西把酒登臨望眼迷
天宇四垂粘地近海山一抹帶潮低
絕知客好無塵事聊記吾曾有醉題

倚賴羣仙聯姓字他年誰敢一抔泥

是日諸公
令余題壁

王季海祕監再賦成園復次韻

雲莊風榭對東西清暑光陰近竹迷
一斗正緣詩興盡兩着休為客愁低
披開豹霧尋陳迹掃盡蛛塵看舊題
健往莫愁騎馬滑闌珊梅雨不成泥

春晚偶題

寂寥春事冷於秋雨打風吹斷送休點檢梨花成一夢
蘸紅新綠滿枝頭

倪文舉奉常將歸東林出示綺川西溪二賦輒賦
長句為謝且以贈行

綺川亭上凌雲賦人在回仙舊遊處誰教書劍走長安
荻月霜楓等閒度朱門不炙釣竿手萬卷難供折腰具
偶然把筯憶蓴羹乞得閒官徑呼渡江漲橋頭有渡船

船頭歷歷東林路雲烟如畫水如天笑憶紅塵問良苦
我亦吳松一釣舟蟹舍漂搖幾風雨因君賦裏說江湖
破帽蹇驢明亦去雞犬相聞望可見鷗鷺同盟心亦許
相過得得款溪門雪夜前村聽鳴榔

送吳智叔檢詳直中祕使閩

抗章襪被豈公難已說高風立懦頑客路莫嫌河畔草
直廬須愛道家山秋生蓮浦船初泛春滿茶溪騎趣還
却訪故人西府舊定煩書札墮田間

楊君居士挽詞

孝至蘭陵茂身脩梓里恭名場兒中鵠
嫻黨壻乘龍駒
隙驚年運蟬媽有慶鍾幽光定無憾
豐刻妙形容

送周畏知司直歸上饒待次

漫郎西笑費三年故業新聞腹果然
長塵劇談抽繭緒
短檠細字綴蠶眠頻驚陸海風波夢
未了京塵粥飯緣
後日重來應訪舊五湖烟浪有漁船

次韻魏端仁感懷侑諧體

浪學騷人賦遠游大千何事不悠悠酒邊點檢顏紅在
鏡裏端詳鬢雪羞過眼浮雲翻覆易曲肱短夢破除休
孤烟落日冥鴻去心更冥鴻最上頭

次韻李子永梅村散策圖

光風先放越溪春蕭散尋詩索笑人藜杖前頭春浩蕩
三生應是主林神

太師陳文恭公挽詞

日者更皇化公來輔聖能無心殊轍混不作衆波澄舉

國材真相他年了中興天如遺一老人亦望三登
候火朝連夕籌帷決縱擒一江奔馬勢千古殺狐林
日黃河誓浮雲綠野心身名兩無憾天壤獨清音

聖父咨當璧元臣預斷金玉衡賓舜日黃屋遂堯心國
定功無迹身閒病已深旌忠有謨訓碑榜照來今

趣召單車至驚傳兩鬢凋傾城迎國老即日走天驕夢
已商人莫身猶漢相朝古來賢達意生滅兩消搖

送陳朋元赴溧陽

九畹滋蘭靜自芳，啁啾誰復認孤凰。
風流歲晚嫌杯酒，文字功深得鬢霜。
敝衣猶能俛仰倚樓，吾敢計行藏。
船開便作江南客，天色無情更鴈行。

次韻韓無咎右司上巳泛湖

休沐辰良不待晴，徑稱閑客此閑行。
春衫欺雨任教冷，病眼得山元自明。
抹黛濃嵐圍坐晚，揉藍新渌沒篙清。
棲鴉未到催歸去，想被東風笑薄情。

太保節使趙公挽詞

密

結髮險艱會捐軀跳盪功鬢凋猶陞戟心在惜弢弓劒
履三槐次樓臺四壁中諸郎競文武不朽是清風

太宜人程氏挽詞

程泰之吏部之母

我昔官黥歙人傳女訓芳尊章宜小婦孫子壽高堂風
木真無定冰魚已不嘗遙憐霜露感何必薤歌傷

捧檄三牲養稱觴百歲期身猶孺子泣世已隙駒馳吉
夢青衣卜豐碑黃綃辭佳城有奇事應足洗餘悲

與王夷仲檢討祀社

殘夜露如雨秋氣淒以分牆西雲正黑跼跼墮金盆良
耜酢西成豆籩藟芳芬去年歲大侵小家甑生塵疫鬼
投其熾虐甚溺與焚皇慈降清問下招離散魂調糜鬻
藥石黑簿回春溫德馨典神天秋稼如雲屯社公亦塞
責醉此豐年樽神兮率舊職為國憂元元自今歲其有
驅癘蒼烟根

王園官舍睡起

公退閉閣卧官居如淨坊屋角斷虹飲日西楊柳黃客

來東我帶客去書滿牀睡覺有忙事煮茶翻斷香

古風酬胡元之

以下白塔
新居作

拂我膝上琴當客清風襟我琴無軫絃不和願借之子
調其音美人一笑千黃金彈作江岸花木深下有同隊
之游魚上有同聲之鳴禽琴聲一疊一歎息江花江草
無終極

題徑山凌霄菴

峰頭非塵寰一舍誰所茨軒着玉霄近按指沙界豁萬

山紛累塊衆水眇聚沫來雲觸石迴去鳥墮烟沒向無
超俗緣茲路詎可越偕行木上坐同我證解脫

徑山傾蓋亭

萬杉離立翠雲幢
嫋嫋稀聞晚吹香
山下行人塵撲面
誰知世界有清涼

題徑山寺樓

浴日蒼茫水捫星
縹緲樓神光來燭
夜壽木不知秋海
內五峰秀天涯
雙徑遊愛山吾欲
住衰疾懶乘流

丙戌閏七月九日與王必大登姑蘇臺招王浚明
陳淵叔耿時舉避暑次時舉韻

始賀火流西還嗟斗斜閏餘暑猶強顏新涼頗難進燥
剛渴欲坼焦卷禿如燼炎官扶日轂輝赫不停運登臨
有高臺勇往得三俊仍將王郎子飛步凌劫仞風從噫
氣來雲作壞山陣鄉如垂頭魚忽已蟄蟲振空明晚逾
清更要孤月印書生乃易與俛仰更喜愠憑闌天為高
舉酒山欲近奇書鐵鉤鎖麗句錦窠暈茲遊我輩獨難

挽軟紅軻君看籠中鳥寧識咸池韻

淵叔出米元章書蹟甚奇

明日夜雨陡涼復次前韻呈時舉

幽懷青松獨直道黃楊閨懶從櫟櫟子遮日干主進閉
戶友千載脫簡理秦燼秋熱出意表誰云法天運摧頽
如鍛翮何暇賈餘俊願從青溪仙飛下二十仞撒波嘯
長風鑒暑陷其陣茲行病未能暍卧何時振一雨忽破
慳江湖發封印天公如仲尼亦念季路慍團扇未全踈
短檠差可近細字讀蠶眠揩眼眩燈暈明當呼我友乘

涼踰游鞞詩代僕吶非敢翫強韻

七月二日上沙夜泛

困倚船窓看斗斜起來風露滿天涯
亭亭宿鷺明菰葉閃閃涼螢入稻花
月下片雲應夜雨山根炬火忽人家
江湖處處無窮景半世紅塵老歲華

浴罷

西城落日半輪明浴罷衣裳一倍輕
玉宇風來歸鳥急火雲銷盡綠雲生

寄溧陽陳朋元明府約秋末過之

海內交情兩斷金，一官分袂阻登臨。
書來恰值看雲眼，夢往誰知共月心。
道義只今無捷徑，溪山依舊有清音。
西風滿棹蒲帆飽，秉燭相尋語夜深。

次韻耿時舉苦熱

赤日纔低又火雲，巷南街北斷知聞。
荷風拂簟昭蘇我，竹月篩窓慰藉君。
避暑無奇那避謗，能觴便了莫能文。
浮湛放蕩從今始，悔把長裾強沐薰。

余家近穿小蓮池
時舉亦種竹簷間

皆為度

暑計

次韻王浚明用時舉苦熱韻見贈

暑窓當午思昏昏雷起千峰睡不聞
鑠石誰能招楚魄
斲冰我欲訪湘君
年華祇合加餐飯
事業休工刺繡文
賴有兩賢南北巷
歲寒幽谷共蘭薰

李次山自畫兩圖其一泛舟湖山之下小女奴坐

船頭吹笛其一跨驢渡小橋入深谷各題一絕

船頭月午坐忘歸
不管風鬟露滿衣
橫玉三聲湖起浪

前山應有鵲驚飛

黃塵車馬夢初闌
杳杳騎驢紫翠間
飽識千峰真面目
當年拄笏漫看山

太傅揚和王挽歌詞二首

先廟垂忠烈
孤童侈舊勲
風雲天策府
心膂殿前軍
已快漸臺感
還看蜀幕焚
人亡汗青在
足以詔無垠

定遠之師

劉豫以廢石梁之役虜帳蕩然功無烈於此者

歲與靈光晚
名登甲令芳
剖符山若礪
交戟鬢如霜
半

世三槐位千秋異姓王哀榮公不憾人自惜堂堂

少卿直閣鄭公挽歌詞

恭老

今代魁梧老終身寂寞濱鬢霜三館直碑淚五州春壽
相空士甲行年竟已辰墳丘纔馬鬣何處著經綸

憶昨登門日驩傳考室詩謂公安且吉何意哭於斯遺
老典刑盡此邦名教悲誰能傳耆舊他日慰吳兒

高景菴讀舊題有感

莓苔風雨舊詩留十七年前鬢未秋巖桂拂雲篁竹拱

樹猶如此一搔頭

華山道中

過午曾雲未肯開
煖寒村店竹筴灰
蕭蕭林響棠梨戰
晚恐陽山有雨來

送嚴子文通判建康

四海論交賴有子
一日不見真愁予
人誰可與話心曲
天忽遣來同里居
懊惱春來不數面
丁寧歲晚猶頻書
黑頭屢別那敢惜
歎息駸駸霜滿梳

次韻王浚明詠新居木犀

月窟移來有貴名一簾金碧照東榮
鼻端入妙睡魔醒眼底會真詩句生
日氣瓏璵無奈醉露華凌亂不勝清
君家傾國何時見淡埽蛾眉撚夕陰

提刑察院王文挽詞

彥光

諭蜀三年戍還吳萬里船雲歸雙節後
雪白短檠前百世春秋傳一丘陽羨田
浮生如此了何必更凌烟

日者悲離索公今又眇冥門人辦韓集子
舍得韋經此

去念築室空來聞過庭平生無路見終古泣松銘

送關壽卿校書出守簡州

東壁星宮館列仙一麾苦欲近田園宅家但寶千金鑑

臣輩何辭萬里船

壽卿述藝祖寶訓為書以獻多屬貴要者

京洛知心塵鞅

裏江吳攜手暮帆邊聲名如此歸安往日日閭門望眼穿

頃自吏部郎去國時獨同舍趙友益追路送詩數

月友益得儀真過吳江次元韻招之

東風分袂省西廊袖有明珠照客航道義有情通出處
文章無地著炎涼君今猶把一麾去我敢倦鋤三徑荒
邂逅天涯如夢寐肯來相對話更長

長沙王墓在閭門外

孫伯符

英雄轉眼逐東流百戰工夫土一坏蕎麥茫茫花似雪
牧童吹笛上高丘

次韻孫長文泊姑蘓館

讀書窓下一燈殘忽有詩來為煖寒聞道扁舟春共載

雪雲雖冷不相干

長文再作復次韻

渚蒲汀蓼得霜殘
歸客思家不計寒
喜鵲門前人一笑
絕勝風色候長干

次韻耿時舉王直之夜坐

庭葉翻翻鬧燈花
粟粟穰穰關山千里鴈
風雨滿城鐘隴
上新登穀江頭舊熄烽
今年吾計得安穩
讀三冬

次韻徐子禮提舉鶯花亭

并序

秦少游水邊沙外之詞蓋在拈蒼監征時所作予至
郡徐子禮提舉按部來過勸予作小亭記少游舊事
又取詞中語名之曰鶯花賦詩六絕而去明年亭成
次韻寄之

灘長石出水鳴隄城郭西頭舊小溪游子斷魂招不得
秋來春草更萋萋

愁邊逢酒却成憎衣帶寬來不自勝烟水蒼茫外沙路
東風何處拄枯藤

壚下三年世路窮，蟻封盤馬竟難工。
千山雖隔日邊夢，猶到平陽池館中。

文章光燄照金閨，豈是遭逢乏聖時。
縱有百身那可贖，琳琅空有萬篇垂。

山碧叢叢四打圍，煩將舊恨訪黃鸝。
纈林霜後黃鸝少，須是愁紅萬點時。

古藤陰下醉中休，誰與低眉唱此愁。
團扇他年書好句，平生知己識儋州。

石湖詩集卷十